

Mingh Vadauz

□ Yiz Ciz / 余执

Seiq

Dahgyaemq seng daeglwg ndeu, hix buen bae ranz moq youq lo, vunz lajmbanj bienqbaenz vunz ndaw singz, de sim gig angq. De mbouj caiq bae guh hong lo, ngoenzngoenz angq-vauvau youq ranz saeg buh bwnq cij ciengx daeglwg, cawj byaek cawj ngaiz caj Daegluez, saedcej couh baenz-neix gvaq roengzbae lo.

Daegluez miz gienz miz cienz, Dahgyaemq gig yousim de youq baihrog miz lwgsau moq, mehmbwk baez miz aen sim neix, cungj dwg youq mbouj onj, ninz mbouj ndaek. Danghnaeuz Daegluez mbouj ciep dienhvah, Dahgyaemq couh daengz gunghsw haeu ra vunz; Daegluez banhaemh hwnz di mbouj ma daengz ranz, Dahgyaemq couh baengzyoux beixnuengx dauqcawq cam\ dauqcawq caz. Haidaeuz, Daegluez raen ndeiri, roxnyinh Dahgyaemh dwg gyaenz de, bet baez cib baez yienghneix le, Daegluez miz di fanz lo. Mizseiz daengz seiz maranz lo, de lij boux dog youq bien dah youzbyaij, mizseiz daengz seiz haeu ninz lo, de lij boux ndeu haeu bouq bae gwn caz.

Haemh ndeu, mbwn laepnyam-nyam, Daegluez raen dawsau he boux dog ndwn youq bien dah, yawj hwnjdaeuj lumjnaeuz siengj mbouj hai nei, Daegluez byaij daengz gyawj, sing saeq cam: “Dahnuengx, mwngz boux ndeu gou boux dog raeuz guhdoih youzbyaij ndaej mbouj ndaej?”

Dawsau mbouj hoiz vah, de baenq ndang gvaqdaeuj. “Byaij!” Gangj coenz vah ndeu couh caeuq Daegluez bingzbaiz youq bien dah youzbyaij, songde nanz mbouj nanz song aen mbaq doxbungz baez ndeu, nanz mbouj nanz song faj fwngz doxdaemj baez ndeu, nanz mbouj nanz gaem fwngz baez ndeu, yienghneix gaem-gaem cuengqcuengq guhdoih byaij le haemh ndeu. Haemhneix, song boux cungj roxnyinh gvaq ndaej soeng-swdswd, diemzsi.

Dawsau neix heuhguh Dahyingh, de youq ndaw singz hai aen diemq nyumx ribdin ribfwngz ndeu, seng’eiq mbouj loek, de ndang hung noh hau, haq gvaq song bae, aenvih de mbouj ndaej seng lwgnyez, cungj deng doxliz. De boux ndeu gvaq saedcej, miz vah naeuz “gag gwn ndaej, gag daeuj mbouj mwn”, seizneix guh ndaej gwn ndaej, mbouj miz maz youheiq, daengz ngoenz ndaej gwn mbouj ndaej bae haenx baenzlawz guh. Dahyingh ciengzciengz naemj daengz gijneix.

Dahyingh mbouj naemj caiq haq vunz, ciuq gij vah de naeuz, lajmbwn mbouj miz bousai lawz doiq de dwg

caensim. De youh naemj miz bousai ndeu, mwh de baeg lai seiz, bousai neix ndaej daeuj inin de; mwh de miz maz saeh dawz mbouj ok cawjeiq seiz, bousai neix ndaej daeuj caeuq de ganggangj vah. Baenzneix, de roxnyinh Daegluez couh lumj dwg bousai de naemj aeu haenx.

Dahyingh itcig naemj bae aeu bous lwgnyez he daeuj ciengx, miz ngoenz ndeu, de caeuq Daegluez dwen daengz gij siengjap neix, Daegluez naeuz ndei. Ciepdaeuj, song bous couh guhdoih dauqcawq ra gyaenz miz lwgnyez yaek soengq vunz, it bae ngeih dauq, Daegluez Dahyingh couh doxliz mbouj ndaej lo.

Seizcin daengz lo, vadauz cingq hai hoengh, Daegluez daiq Dahyingh daengz ndawranz daeuj, doiq Dahgyaemq naeuz songde gaenq baenzlawz baenzlawz. Daegluez naeuz: “Dahgyaemq, danghnaeuz mwngz naemj caeuq gou doxliz, gou couh soengq aen ranz ndaw singz neix hawj mwngz, lwgni gou caeuq mwngz guhdoih ciengx. Danghnaeuz mwngz mbouj caeuq gou doxliz, raeuz 3 bous couh guh ranz ndeu. Dahyingh youq ndawsingz miz ranz, de mbouj daeuj ranz raeuz youq, mboujgvaq ni, de miz maz gungzhoj raeuz aeu doxbang doxbang, ngoenzlaeng sou couh dang dwg beixnuengx ba.”

Dahyingh doiq Dahgyaemq naeuz: “Dahnuengx ha, mwngz youq neix hix mbouj miz beix miz nuengx, mbouj miz bous ing bous baengh, gou saedcaih cuengq mbouj ndaej Daegluez lo, mwngz couh naemjnaemj ba, gou caj mwngz aeu vah.”

Dahgyaemq mbouj doeksaet, hix mbouj daej mbouj nauh, de gietdingh mbouj doxliz, caih Daegluez baenzlawz gvaq couh baenzde gvaq, saedcej couh yienghneix laebdaeb gvaq roengzbae.

Haj

Mbouj geij nanz, Dahyingh daj fuzliyen lingx aeu dahniq he daeuj ciengx lo, dahniq neix gyaoulili, naj luez noh maeq, gig dwggyaez. Dinggangj dah neix okseng geij ngoenz couh deng vunz soengq daeuj fuzliyen, mbouj rox bohme dwg byawz.

Miz dahniq neix, gij saedcej Dahyingh gvaq ndaej miz saek miz feih, de guh seng’eiq, daiq lwgnyaeq, ngoenzngoenz nyaengq mbouj dingz, de nyaengq ndaej vaiqvued, nyaengq ndaej rimhoz, ciemciemh lumz bae de lij miz Daegluez. Mizseiz geij ngoenz mbouj caeuq Daegluez gangj vah, mizseiz Daegluez daeuj daengz ranz,



de hix mbouj ndaej damswt Daegluez. Doenghbaez baez doxraen, song bous couh doxgot doxcup mbouj siengj cuengq fwngz, seizneix doxraen, cungj mbouj rox gangj maz vah ne, guhdoih gwn\guhdoih ninz couh engq noix lo.

Daegluez naemj, yawj hwnjdaeuj de lij beij mbouj hwnj dahniq lingx dauq ciengx bw, vihmaz ni? Vihmaz bousvunz bienq ndaej baenz-neix vaiq ne?

Dahyingh doiq Daegluez naeuz: “Gou caeuq mwngz mbouj doxaeu gvaq, mbouj dwg gvanbaz, cij ngamq-ngamq dwg baengzyoux. Baengzyoux baengzyoux, lij maij couh doxra, mbouj maij couh cuengq fwngz, mwngz rox sim gou, lij gyaenz gou, raeuz couh yienghneix doxraen roengzbae. Danghnaeuz mwngz raen gou mbouj baenz, raen gou mbouj rim hoz mwngz, raeuz couh mbouj caiq doxraen couh ndaej lo, mbouj miz baenzlai vihmaz.”

Duenh seizgan he gvaqbae, Daegluez ciemhciemh roxnyinh aen sim Dahyingh caen mbouj cuengq youq gwnzndang de, de bienqbaenz bous vunz naemj yungh couh ra, mbouj naemj yungh couh cuengq youq henz ndeu, naemj bae naemj dauq, de gietdingh mbouj caiq raen Dahyingh.

Daegluez bous ndeu ninz youq gwnz congz, gag naemjnaemj gij roen swheij cibgeij bi neix byaij gvaq haenx. Daj de caeuq Dahyingh doxmai le, Dahgyaemq couh okbae ra hong guh lo. Banhaemh ndaejhoengq Dahgyaemq couh bae dwkgeiz, Daegluez gag cawj gag gwn, song bous gag ninz gag aen rug he, doengz youq aen lajroq ndeu, gag bous gag gvaq saedcej.

Daegluez byoemgyaeu hau bae dingz lai lo, de mbouj gamj yawj gingq, de gig lau yawjraen aen yienghcej swheij gaenq ciemhciemh bienq geq.

Mbouj rox daj seizlawz hwnj, Daegluez baenz ae lo, hwnz ae,

ngoenz ae, gwq ae mbouj dingz. Canghyw naeuz aen bwt de miz di caeuq bouswnq mbouj doxdoengz, aiq dwg miz bingh lo, heuh de ndeindei yietnaiq, vaiqvaiq daeuj yw. Daegluez naemj daengz ranzmbanj, naemj daengz ranzgaeuq, ranzmbanj bya sang faex loeg, hoengheiq ndei, de naemj dauqbae ranzgaeuq youq duenh seizgan he.

Hix dwg yaek daengz cieng seizhaenx ba, Daegluez dauq daengz ranzmbanj, gaenq yaek 10 bi mbouj dauq ranzmbanj lo, ndaw mbanj ranzlaeuz aen beij aen moq, aen beij aen sang, aen ranz de lij dwg ranzvax, cien nding vax loeg, gwnz ciengz gaenq hwnj rim go’nya, yawj hwnjdaeuj gaenq nanz mbouj miz vunz youq lo.

Dou ranz daep dwk, Daegluez mbouj rox baenzlawz haeu ranz, de youq bakdou ranz baenq bae baenq dauq. Bous ranznden ndeu gvaqdaeuj, ndenq yaekseiz hawj de naeuz, Dahcinj bae gaen dahdaih de youq lo, mbouj rox dauq mbouj dauqdaeuj gvaqcieng.

Daegluez haeu daengz ndawranz, ndawranz youh cumx youh haeu mwt, muengxgyau rangh rim gyang ranz, gij faenx gwnz benj nanwtnt, aen rek hwnj myaex, aen cauq hwnj nya, naeuz gizneix dwg ranz, dauq mboujyawx naeuz gizneix dwg ndaw ndoeng.

Daegluez bingh yied ngoenz yied naek, vunzmbanj soengq de daengz yihyen seiz, canghyw naeuz daeuj ceiz lo.

Dahcinj daeuj daengz yihyen yawj Daegluez ngoenzhaenx, Daegluez gaenq gangj mbouj ok saek coenz vah, de raen Dahcinj daeuj daengz, lae roengz geij coij raemxda le, couh laep da bae faen de lo.

Daegluez gvaqseiq bihaenx, de caengz rim 50 bi.

(sat)